

B. N. C.
FIRENZE
1043
22



Typographus Lectori.

IN meas nuper manus venit Epistola Illustrissimi, & Eruditissimi Viri D. Caroli Cartharij Aduocatorum S. Consistorij Decani, tradens notitiam Operis meis Typis, ac sumptibus editi: Eam seorsim impressi, præsertim pro vsu illorum, qui scribunt Diaria Literatorum. Superuenit deinde Censura Doctissimi P. D. Caietani Passarelli Clerici Regularis S. Romanæ Vniuersalis Inquisitionis Qualificatoris, quam cum in lucem emittere decreuerim, simul cum illa iterum Typis subijcio eandem Epistolam, vt vtramque addam ijs exemplis Voluminis, quæ nondum vendita sunt. Vale.

EPISTOLA ILLUSTRISSIMI DOMINI
CAROLI CARTHARII VRBEVETANI

Aduocatorum Sacri Consistorij Decani, & Archiuij
Apostolici Arcis S. Angeli Præfecti.

Ad Illustrissimum ac Reuerendissimum D.

PROSPERVM BOTTINIVM

Archiepiscopum Myrensem, & Fidei

Promotorem.

Qua ad notitiam deducitur Opus inscriptum

DEMONSTRATA IMPIORVM INSANIA.

Nuperrimè

A P. Ioanne Laurentio Lucchesinio Lucensi
editum.

III.^{me} ac Reu.^{me} Domine.

CVM Dominatio Vestra Illustrissima à me requirere dignata sit, quid sentiam de Opere nuperrimè in lucem edito Patris Ioannis Laurentij Lucchesinij Lucensis, Venerabilis Societatis IESV Alumni, sanguine, ac beneuolen-

* (b2)

tia

tia cum ipsa Dominatione Vestra Illustrissima coniunctis-
simi, ab eodem Authore humanissime mihi dono dato, & à
me accuratè, atque verbatim perlecto; en, quid sentio, profe-
ram. Inscriptio talis est. *Demonstrata impiorum, infania.*
Siue Noua Copia, & Series centum euidenrium Signorum vera
Fidei, oculis subijcientium Veritatem Ecclesia Romana, Sacra-
que Monarchia Pontificis Maximi, Argumentis plusquàm mille
debellantium Schismaticos, & Hereticos: & alijs plusquàm du-
centis euerrentium directè, ac singillatim Atheos, Theistas, In-
daeos, Mahometanos, Ebnicos, manifesta dementia redargutos.
Ex solius Inscriptionis contextu, qualis Operis maiestas sit,
& quid in Opere ipso pertractetur, quis non percipit?

Paucissima hæc scripseram, quando iterum à me perlecta,
vna, atque altera præstantium Virorum sententia, initio Li-
bri præfixa; nempe P. Paulini Bernardinij Ordinis Prædicato-
rum, Sacræ Theologiæ Magistri, Sacræ Congregationis In-
dicis Consultoris, & in Romanæ Sapientiæ Vniuersitate pu-
blici Professoris: nec non P. Blasij à Purificatione Carmelitæ
Discalceati, Sacræ Theologiæ Professi, ac sui Ordinis Histo-
rici generalis; qui Volumen cedro dignum censuere; cala-
mum deposui, inquit: ad quid mea opinio, vbi duo præ-
clari Iudices sententiam protulere?

At mutato consilio, & calamo reassumpto, Archipræsulis
Prosperi Bostinij, genio indulgeo, iussionibus obtempero;
qui, vt in hac Vrbe, ex Præscripto Sedis Apostolicæ Orthodo-
xæ Fidei Promotor existit; ita Lucchesinij Operis, quod ean-
dem Catholicam Fidem strenuè propugnat, Promotor euadet.

Meum itaque consilium non est, singulas insignis Operis
dotes attingendi; sed solum iuxta introductum morem, in
Diarijs Literatorum, & Compendijs Historicis Voluminum,
quæ de recenti in dies luci exponuntur, quæ in Gallia, Par-
mæ, & alibi Typis eduntur (& in hac Alma Vrbe, præfixo
Titulo *Giornale de' Letterati* obseruabatur) animaduertendi
quid noui ferat.

Arduum sanè videtur aliquid noui in Materia afferre,
quam Authores plurimi pertractarunt, & in qua laus ab alia
re:

re quærenda non est, quàm à soliditate, feligente illa, quæ magis prosint ad veritatem patefaciendam. Attamen si post tot Sanctos Doctores, & alios, qui de hoc egerunt, potuit Thomas Bozium Volumina duo conscribere *De Signis vera Ecclesiæ*, & centum eiusdem Ecclesiæ Signa afferre; etiam alij totidem possunt recensere.

Hoc sanè præstitit Author noster; quia noua plerumque sunt Signa ista: noua series: noua Argumenta probantia veritatem, & efficaciam Signorum: nouus modus elegans, & figuratus, quo afferuntur: noua modestia, qua, nihil lædendo Nationes, solum impietatum Sectarum duces condemnat.

Quoad Signorum nouitatem, qui Bellarminum, Granatam, Bozium, & alios, hoc Argumentum pertractantes, perlegerunt, animaduertent, ferè nihil ab ipsis nostrum Authorem mutuatum fuisse, præterquàm ubi ipsos allegat.

Series est penitus noua, vt statim obseruare poterunt percurrentes Indicem Signorum Bozij, quem Author affert in calce Epistolæ ad Lectorem; & Indicem Signorum ipsius Authoris, qui solum coincidit cum septem, aut octo ex illis, quæ à Bozio traduntur; ac diuersissimam ab illo methodum seruat.

De nouitate Argumentorum statim eruditis constabit; licet enim aliqua ex ijs ab alijs allata fuerint ad particulâres Controuersias soluendas: attamen adhibita non sunt ad statuenda generatim Signa veræ Fidei; inter quæ vnum præcipuum est Authoritas visibilis Ecclesiæ, quam validissimè demonstrat, recensendo ex ipso Facto, non ex Iure, Experimenta innumera Pontificiæ Potestatis, tam in Oriente, quàm in Occidente.

In his conglobandis experimentis, & ad suas Classes reducendis, insignis etiam nouitas fulget, cum nihil simile in alijs à me repertum fuisse Scriptoribus meminerim.

In Historia ipsa omnem nouitatem exhorret: sed confectatur Authores in Ecclesia receptissimos, Græcos, & Latinos, præsertim Sanctos, ideoque maximæ authoritatis: ac etiam hostes, in quantum Catholicæ Ecclesiæ fauent, videlicet an-

tiquos Hæreticos, & Schismaticos, Eusebium, Socratem, Sozomenum, Zonaram, Nicephorum Callistum, Photium, aliosque huiusmodi; ex quibus magna vis petitur ad stabilendam Catholicam Veritatem; quam præterea fundat præsertim Author ex Actis Generalium Conciliorum, quæ in Græcia celebrata sunt.

Licet autem in Historia nouitatem quoad res ipsas omni studio vitet; plurimam tamen lucem sua methodo eidem Historiæ affert, præsertim ubi agit de seminibus, & origine præcipuæ rebellionis à Romano Pontifice, scilicet Orientalis, quam alij à Photio inæperunt. Ipse autem à supradictis, & alijs recentioribus; sed probatissimis Scriptoribus, Allatio nempe, Cariophylo, Arcudio, alijsque ostendit, ante Photium initas fuisse septem velitationes, & initia pugnæ à Græcis cum Latinis: atque ipsas discordias antecedentes, & consequentes in sexdecim diuidit.

Nouum etiam est, ex ipsis initijs, & progressibus rebellionis Schismaticorum argumenta falsitatis eiusdem Schismatis eruere, & à fortiori Hæresum.

Præterea lucem magnam affert Quæstionibus multis Ecclesiasticis, huc vsque agitatis; & manifestas reddit res, quæ adeo claræ non videbantur.

Elegantia verò, atque eloquentia, qua medelam affert veneno Authorum recentium hæresum, qui plurimos lepore styli deceperunt, in hac materia penitus noua est; & vix in alijs materijs inuenitur Author, qui tantam rerum facundiam exhibeat, congerendo plurimas, & non repetendo easdem inanibus verbis, atque ad legendum alliciendo. noua eruditionum copia semper allata, non ad pompam, sed ad argumentum roborandum.

Exhortationes, quas in fine quarti Libri, & in quinto affert contra septem species errantium in Fide, videlicet Schismaticos, Hæreticos, Atheos, Theistas, Iudæos, Mahometanos, atque Ethnicos, licet in Paragraphos diuidantur, maioris claritatis gratia, atque vt magis serics Argumentorum appareat, attamen coniunctæ constituunt Orationes insignes, plu-

plurimis Argumentis contextas : verbi gratia octoginta quatuor contra Atheos, ac Theistas ; quæ totidem sagittæ videntur, ad salubriter ipsorum animos vulnerandos.

Nouum pariter est, quod, Infideles impugnando, ab Atheis non incipiat, vt fieri solet ; sed expendi, opportunum fuisse, prius centum Signa Veritatis contra illos afferre, qui minus à Nobis discrepant, Schismaticos videlicet, & Hæreticos, ac deinde seligere ex istis ea, quæ valent etiam contra alios veræ Religionis aduersarios.

Nullus præterea (quod nouerim) impugnauit (non solum indirectè, scilicet probando Veritatem Catholicæ Fidei ; sed etiam directè, afferendo Signa eiusdem Fidei contra singulas Sectas) errores earundem singularum Sectarum : quod adeo efficaciter hic præstatur, vt Atheos, verbi gratia, atque Theistas à nullo tam solidè, ac patenter profligatos viderim.

Id certè, quod in Operis Titulo promittit ; videlicet à se demonstrandam Impiorum insaniam, egregiè implet : tum quia plurima ex Argumentis sunt demonstratiua ; tum etiam (& multò magis) quia ex omnibus, quæ contra singulas Sectas intorquet, resultat Demonstratio plus quàm moralis ; quæ potius (vt Author notat) Metaphysica videtur dicenda : nec sanè potest dari, quod non sit vera Fides illa, quam Deus Omnipotens tot Signis ostendit esse verissimam, scilicet Romanam : Diuina siquidem Maiestas perpetrare nequit Miracula ad homines decipiendos, vt optimè animaduertit Author.

Ipse Titulus Operis aliquibus nouus videri potest ; sed plurimi sunt, qui Demonstrationes appellant Signa Fidei, constituenta euidentem Credibilitatem, & Credenditatem, scilicet euidens Meritum, & Obligationem credendi. Quod autem Impij appellentur Infani, vetustissima res est ; & ipsi omninò putant, tale sibi à Nobis nomen tribui, vt illis tributum est à S. Ioanne Chrysostomo, alijsque plurimis.

Hoc denique Opus non solum omnibus impijs, si ab illis expendatur, summopere prodesse poterit, & proderit : sed etiam Controuersistis, & Missionarijs ad omnes Infideles.

Iuvenes autem qui Rhetoricæ student, habebunt hîc Florilegium formularum, præsertim pro rebus sacris, atque nervosæ facundiæ exemplar, affluentis copia rerum illustrium. Ac demum Catholici omnes motiua inuenient, ex quibus validè confirmabuntur in Sanctissima Religione, cuius in sinu suauissimè conquiescent.

Hæc habui, quæ sincerissimè (hoc est meo more) scriberem ad Illustrissimam Dominationem Vestram; quam enixè precor, vt ipsi Patri Lucchesinio stimulum addat, quantò citius præclarum Opus *De Concilijs* prælo tradendi. Et Archiepiscopi Bottinij sacratas manus deosculor; eique à Deo Opt. Max. fausta omnia precor. In Vrbe. Die xxiv. Mensis Iunij. Anno Reparatae Salutis MDC LXXXIX.

Dominationis Vestrae Illustriss. ac Reuerendiss.

Additiss. & Obsequentiss. Seruus

Carolus Cartharius.

AD ILL.^{MVM} AC REV.^{MVM} D.
 PROSPERVM BOTTINIVM
 Archiepiscopum Myrensem, & Fidei
 Motorem, Sanctique Officij
 Consultorem.

R.^{MI} P. D. CAIETANI PASSARELLI
 CLERICI REGVLARIS
 Sanctæ Romanæ Vniuersalis Inquisitionis
 Qualificatoris, & Catholici Regis
 à Concionibus

Censura Libri, qui inscribitur

DEMONSTRATA IMPIORVM INSANIA.

PLACVIT tibi, Illustrissime, ac Reuerendissime Domine, eo mecum imperio vso, quod repetitis titulis, iuribusque exercere debes, ac potes, imponere mihi, vt Librum euoluam, nuper luci publicæ traditum ab Adm. R. P. Lucchesinio è Societate IESV, non minus tibi claritudine generis per arctam cognationem, quàm virtutum, morumque splendore coniuncto; cumque Viri huius Curia doctissimi præclarè, ac magnificè, vt par erat, de eodem Opere censuissent, mihi etiam præcipis, vt primarijs me viris immisceam, & calculum quoque meum in urnam inijciam. Obedientiæ itaque conditioni meæ propriæ, & obsequij merito prælucente, auidos legendi ad moui oculos, si in argumento fortasse multitudine Auctorum, ac serie excusorum Librorum adeò trito, reuolutoque, ac propè, vt ita dicam, effæto, noui quidquam, & peregrini interlucere posset, quod ingenium illustraret, & Voluminum similitudine, & copia nauseantem ferè iam animum recrearet.

Porro hæc primùm, nec minus attentè, quàm iucundè, in

fronte, ac Titulo Libri = *Demonstrata Impiorum Insania*. Infanos quippe vocat Hæreticos, & Schismaticos, & lutulentas alias Sectas, ab aureo Diui Chrysostomi fonte aduersus Hæreticos hoc pulchro epitheto mutuato: quo nihil reuera proprius, & congruentius aptari Hæreticorum sensibus potest. Concilium quippe Constantiense plerasque Ioannis Wiclephi assertiones *Insanas* appellat, & Ioannes 22. in Extrauaganti: *Gloriosam*: erroribus Henrici de Sena, & aliorum Sectariorum *Insania* notam inurit, idque passim ab alijs Pontificibus usurpari, dum anathematum fulmina Hæreticis iaciunt, videre facile est: cum enim Hæresis, siue Schisma sit error fixus in intellectu, ipsam, cui inhæret, intelligentiam corrumpit, ac prope cerebrum labefactat. Prolusionem totius Operis Auctor à Fide Diuina petit; disertè quidem eius extricando Mysteria, cuius Signa velut radios inde manantes prodere statuit: in quorum explanatione Mysteriorum, & per veli opacum passim doctrinæ suffusa luce, maximè me delectant viuida quædam exempla, quibus obstrusiora Fidei latibula, intimosque recessus eloquentissimè aperit, ac penè subijcit oculis. Inter alia, ne omnia præteream, illud floret exemplum, quod Iudex certè, & cum euidencia credibilitatis procedit ad sententiam supplicij, non viso, nec palpato crimine rei, sed testium dumtaxat incorrupta fide subnixus. Ceterum ideo moralis doctrina Socratis super omnes morales Philosophos à Platone, & Xenophonte summis laudibus celebratur, quia moralia ille præcepta per vulgaria exempla, ac similitudines fundens veram virtutis pulchritudinem velut spirantem oculis exhibebat. Accedunt quoque huic Fidei explicationi quædam lumina Sanctorum Patrum, ac flores sententiarum, Theologorum rationibus interposita, quæ magis doctrinam corroborant, & illustrent. Hæc de quasi prologo Operis.

Totius libri series ex centum euidentibus Fidei nostræ Signis conflatur. Pleraque Signa Noua sunt, nec à Bozzio, nec ab alijs, qui latè de hoc argumento scripserunt, animaduersa. Hæc omnia ad quatuor capita, siue fontes, vnde multiplices doctri-

v

doctrinæ, & eloquentiæ riuuli effluunt, suo ordine reducuntur, nimirum quod Ecclesia Romana sit Vna, quod sit Sancta, quod sit Catholica, seu Vniuersalis, quod sit Apostolica. Huiusmodi tituli, & nomina sub distinctis Libris, articulisque latissimè complectuntur, quod Romanus Pontifex sit Ecclesiæ Monarcha, legitimus Sacræ Scripturæ Interpres, Supremus Iudex in causa Fidei, Infallibilis, & irrefragabilis, Caput & Rector Vniuersalis Ecclesiæ, & Superior Vniuersali Concilio; itaut aduersus illas Assertiones à Clero Gallicano recenter obiectas, & quantum deinde in earum fauorem scripsit Maymburgus, alijque Recentiores, quædam velut Officina ostendatur, in hoc Opere elaborata, ex qua cudi, arripi, acui tela, ac vehementer torqueri in Nouitatis interitum possint. Præsertim cum in doctrinæ adminiculum adsint solidæ, nec tritæ Patrum sententiæ, quas hætenus non vidi ab alijs Auctoribus allegatas, simul Sacræ Scripturæ sensus mirificè elucidati, simul etiam in allusione proprietas, neruus in sententia, acumen in doctrina, robur, & vigor in argumento, concentus in ordine, amænitas in dictione, candor in eloquio, ita, vt styli aculeum Hæreticus, & Schismaticus sentiat, & mella ibi quoque degustet lector. Porro autem elegantes quasdam Patrum sententias, reconditasque doctrinas vel aceruatim, vel obliquè, vel perfunctoriè, & quasi per transitum tanquam lapillos Auctor interdum incuriosè iacit, vt nonnisi eruditissimus vir, & in materia longè versatus animaduertere, aut legere omninò sciat.

Aduersus Hæreticos eleganter, & acriter Opus inuehitur, & præsertim in illam ab ipsis, & fatuè, distinctionem consistam, quæ alios statuit Fidei *Fundamentales* Articulos, quales in Apostolico, & Nicæno Symbolo continentur, alios *Accessorios*, & in illis se cum Catholicis convenire, in his verò discrepare, parum, aut nihil momenti esse: quæ quidem impia distinctio, & chymerica ratio nunc in Anglia, & Germania vigens, cladem ingentem edit, id propterea discriminis inter Catholicos, & Hæreticos statuentium, quod inter diuersa Theologorum Gymnasia interest; quæ nefaria distinctio

ctio hic doctè, neruôsè, & peracutè conuellitur. Obiectantur hic etiam, & copiosè Hæreticis Nouitates, antiquis Ecclesiæ, & Patrum Traditionibus aduersantes, & post longum circuitum eò impudentiæ, atque insanix redacti ostenduntur, vt iam illi conuicti, id nunc credere Ecclesiam, quod Sancti Patres Latini, Græcique superna luce tradiderint, has Catholicas Veritates in Sanctorum Veterum Patrum libris expressas, *manos*, siue Patrum *errores* dicere petulanter, & impiè non erubuerint. Quod idem est, ac dicere cogi, quod errore lapsus est Athanasius, quod desipuit Chrysostomus, quod caligauit Ambrosius, quod offendit Gregorius, quod delirauit Augustinus: quæ in eisdem retorta illatio in hoc etiam blasphemus validè sternit. Longè præterea, latèque in Opere patet, carere Hæreticos Spiritus Sancti assistentia, prophetico dono, miraculis, morum temperie, puritate doctrinæ, decore virtutum; imo omnia veriùs per præstigia, per fucos, & fraudes agere, logomachiam, & homonymiam, & circulationem in omnibus exercentes. Sed singularis, & egregius inter reliquos eminet ille tractatus in pagina 428. vbi Regulæ plurimæ consignantur ad omnes hucusque exortas, & exorturas quoque Hæreses labefactandas, & quasi quoddam in illo Armamentarium instruitur, quo per diuersa armorum genera, singula singulis erroribus apta, omnes Nouatores cum nouitatibus proteruntur.

Vehementior tamen ab Auctore cum Schismaticis pugna conferitur, & primùm concinna, atque lepida historiæ methodo quærens, quod non fuerit Schismatis causa, scilicet non certamen Sancti Papæ Victoris de Paschate cum Asiaticis, non Sancti Stephani Papæ cum Diuo Cypriano de reitendo Baptismo dissidium, non querela Græcorum aduersus Latinos de Processione Spiritus Sancti per additam Symbolo particulam *Filioque*, non scissio Romani Imperij, dum rerum, singulas rationes, causasque affluenter percurrit, & grauitè excutit, antiquiora Ecclesiæ Veteris monumenta, & notitias insignes tum profanæ, tum Ecclesiasticæ historiæ aperit, ac prope subiicit oculis: deinde expositiuo sensu reciprocans,

veramque Schismatis causam exponens, alios historices fontes, & Annalium diuitias exerit, nec minus doctrina instruit, quàm vbertate rerum, & copia animos pascit: iudicio quoque incorruptus, & integer, electione in proposito melior, cum potissimam Schismatis causam refert ad Photium, perditamque Bardæ luxuriam, exemplo videlicet ab Anglicano Schismate repetito; sicut enim Anglia propter Henrici Regis impudicitiam, qui legitimas Catharinæ adulterinis Annæ Bolenæ nuptijs postposuit, ab Ecclesia defecit: ita superinducta pellex à Bardæ in expulsa Coniugis locum, & assentatio Photij, qui ereptas idcirco Ignatio, qui facinori obstabat, Insulas interceptit, pessimum Schisma comparauere. Quo Auctore nemo profectò melius mihi videtur in originem Schismatis collimasse; nam scelera ut plurimum ex libidine orta, mutationem regiminis inuexere, rerumque sublunarium euentus veteres noui, ac nouos veteres excipientes, fluxu, refluxuque perpetuo tanquam in Orbem circumferuntur.

In iisdem autem Schismaticis oppugnandis, conserto pede, & breuibus, sed ineluctabilibus, & quasi fatalibus armis Auctor videtur incumbere, ad illius adagij similitudinem: Quod iam res ad Triarios peruenit; quando scilicet eò pugnae calor, ardorque deuenit, ut extremo conatu, summisque viribus agitetur. Irrefragabilia inter cætera, nec fortiora librari posse ego arbitror argumenta, sunt. Quod Ecclesia Schismaticorum nullo ordine, nulla vnitate compaginatur; pars enim Constantinopolitano Antistiti, altera Alexandrino, hæc Antiocheno, illa Hierosolymitano seorsim obedit, nulla ab altera ad alteram prouocatione recepta, singulis velut Insulis à continente, communique consortio rescissis. Quod acriter certamina, & æterna prope dissidia eosdem Schmaticos distrahant, atque diuellant, cum & illos nec certa Regula, lexue teneat de Ritibus, & cæremonijs, de Ecclesiastica disciplina, de Dogmatibus Fidei, quasi naues sine clauo, sine Rectore, sine Duce in alto gurgite fluctuantes. Quod tandem ipsa rei Nouitas, quæ nec placuit Diuo Athanasio, nec Basilio, nec Gregorio Nazianzeno, nec Chrysostomo, alijsque inelytis

viris,

viris, & Græcis, qui subiectionem, & vnitatem cum Ecclesia Romana coluerunt, per se ipsa suspecta, vt Nouitas, est. Tanti enim valet argumentum à Nouitate ductum, vt D. Augustinus contra Academicos agens, & præsertim contra eos, qui asserebant, animam rationalem produci è potentia materiæ, his tantummodò verbis confutauerit: *Ipsa Nouitas displicet*.

Hæc omnia quoque doctrinæ lumina in centum Signa, & veræ Fidei tesseræ sparsæ, supra mille argumenta ab Auctore prolata excipiunt, eandem veritatem corroborantia, & lucem doctrinæ addentia; vt quidquid de hac materia ratiocinando, arguendo scripserint Bellarminus, Bozzius, Sanderus, Bo-uerius, & alij, ex composito, vel per transuersum nedum complectatur hoc Opus, sed etiam plurima noua adijciat, nouasque latebras detegat tum ad Nouatores confodiendos, tum ad effugia fraudibus præcludenda. Inter hæc singulare, & rarum quoddam occurrit, & animaduersione maxima dignum. Id porro est, quod præcisè non negat Auctor, Miracula apud Schismaticos esse, nec illud propterea omninò refellit, quod in Oriente contingere narrant Schismatici, per excommunicationem scilicet à Schismaticis Episcopis latam, sæpè sæpius defunctorum corpora intumuisse: & hanc ibi Auctor rationem assignat, quia potest Deus ea ordinare Miracula, ne illi à Schismate (quod minus malum, cum Ecclesiæ Sacramenta non respuat, esse videtur) ad impietatem Mahometicam deuoluantur. Quæ quidem sententia prima facie difficilis esse videtur, & Baronij doctrinæ opposita anno Christi 34. asserentis, Miracula esse dotem à Christo Catholice tantum Ecclesiæ legatam, & in veritatis attestationem, proposita. Schismatici verò sunt extra Ecclesiam Catholicam, vt ab illa separati: carent etiam iurisdictione ad valorem censuræ necessaria, vt docet de Schismaticis Diuus Thomas. 2. 2. q. 39. art. 3. vnde lata ab illis excommunicatio cum nulla sit, nec metuenda, absurdum est quoque dicere, quod Deus in confirmationem violentæ, iniquæque sententiæ miracula faciat. Nihilo tamen minus Auctoris doctrina constat, nam Baronius ibi videtur loqui de Hæreticis, & hie

Auctor patenter loquitur non de Hæreticis, sed Schismaticis, prout Schismatici sunt, qui iuxta doctrinam D. Thomæ in eadem quæst. art. 1. non sunt formaliter Hæretici. Nec illa Miracula edita asserit Auctor in Schismatis, vel usurpatæ iurisdictionis probationem; sed, inter alias causas, ne Schismatici in Mahometismum præcipitentur. Sicuti Deus causando materiale peccati permittit dumtaxat malitiam illi annexam, propter fines, qui pertinent ad Providentiam vniuersalem. Terrorem præterea per illud prodigium censuræ comparatum intelligit Auctor pro Censura in suo genere considerata, non pro tali censura, quæ ob defectum iurisdictionis est nulla; quod tantum perfunctoriè delibatur Auctor, cum ipse ex professo loquens luculentius argumentum excutiat.

Amplius ego adijcio, ad vberiore doctrinam, & maiorem Auctoris sententiæ firmitatem, Theodoretæ auctoritatem apud Anastasium Episcopum Nicænum in tomo primo Bibliothecæ Patrum editionis Parisiensis 1589. iam expurgato per correctionem Romanam editam sub Paulo V. anno 1607. quæ ita se habet: *Quando ergo videris, & per Hæreticos, & per Incrudulos fieri aliquod signum, ne obstupeas, aut à recta Fide diminearis; sapè enim etiam eius, quæ accedit, Fidei, ea est, quæ Signum facit, non eius, qui fecit, dignitas.* Et paulò post addit: *Mulii enim sapè non solum Orthodoxi peccatores, sed etiam Hæretici, & Infideles fecerunt Signa, & prophetarunt, cum Divina quadam dispensatione, ut diximus, eis esset concessum: ut in Balaam, & Saule, & Nabuchodonosor, & Caiapha licet inuenire, propter causas rationi consentaneas.* Multa ad rem congeri possent; sed hæc dixisse sufficiat, ut pateat, quod, si noni quidquam, aut peregrini in hoc Opere inseritur, inconcussa ratione, & solido fundamento firmatur.

Aliud etiam est, quod in hoc Libro mihi maximè placet, quod eius scilicet Auctor non repudiat, sed libenter admittit, & probat Epistolas Decretales Summorum Pontificum, etiam quæ à Papa Clemente Primo vsque ad Sixcium enumerantur, circa quas Nostrates nimis leues, ac faciles ad eas reiiciendas, præterquam quæ in Actis Conciliorum, & apud

probatos Auctores recitatae reperiuntur, aliquorum argutijs, speciosisque argumentis celeriter, & inconsulto manus dedere, minimè attendentes, eadem quoque argumenta posse applicari epistolis Diui Augustini, Hieronymi, Tullij, Plinij, quarum paucae, quae videntur adiectitiae; & intrusae reliquas vitare nequaquam possunt; praesertim cum errore transcriptorum per vitium antiquitatis aliqua in aliquas irreperere absurditas potuisset. Sic, & immerito quidem, à nonnullis reijcitur Liber Diui Thomae de Regimine Principum propter personam ibi allegatam, Diui Thomae temporibus minimè congruentem: quod tamen errore transcriptoris, qui ad dilandam temerè argumentum per hanc additionem Textus veritatem corruptit, id euenisse constat; siquidem tale mendum, erratumque in Originali eiusdem Diui Thomae, quod extat in Bibliotheca Vaticana, non inuenitur. Gratulor igitur nostro Auctori, & gratias ingentes ago, quòd eas Epistolas asserendo meretur benè, & praeclare de Apostolica Sede, cum Primatus Romanae Ecclesiae, & Suprema Romani Pontificis Auctoritas nullibi vehementius, & clarius, quàm per has Epistolas innotescat: eaque propterea sollicitudo, quae Romanae Ecclesiae æmulos premit ad illas Epistolas contemnendas, ac reprobandas, vrgere studiosos deberet ad easdem tuendas, & confirmandas.

Id praeterea, quòd Auctor contra Graecos de Processione Spiritus Sancti tum historicè, tum theologicè exponit, tanta copia, eruditione, & vbertate doctrinae spargit, vt neminem profectò viderim, qui exactius, ac luculentius hanc materiem excusserit. Probat enim, ante Concilium Generale Primum Constantinopolitanum neminem Graecorum negasse Spiritum Sanctum à Patre, Filioque procedere; ideoque hunc Articulum in illa Synodo manifestè sancitum, aut declaratum non fuisse. Accedere quoque Patrum Graecorum, qui ante, & post illam Synodum floruerunt, consensum, per varias Similitudines, Symbolos, & Metaphoras, eandem Emanationem ab Vtraque Persona disertissimè attestantium iugulatam deinde hanc Hæresim fuisse in Concilio Ephesino Primo inter alios

alios Errores Nestorij, & huic damnationi denique subscrip-
sisse Quartam, Quintam, Sextam, & Septimam Synodum Ge-
neralem; & alia huiusmodi, quæ ad rem faciunt, ea amplitu-
dine, doctrinæque soliditate peragit Auctor, ut nihil excusan-
dum apponat, nihil in proposito desiderandum omittat.

Postremò Auctor ad quinque Infidelium genera, nempe
Atheos, Theistas, Iudæos, Mahometanos, & Ethnicos, per
distinctas Paræneses conuersus, eos robustis, constipatisque
argumentis à naturæ ordine, à dictamine rationis, à disciplina
morum, ab implicantiâ rerum, alijsque locis elegantissimè
ductis, & simul eloquentiæ velut flumine obruit. Equidem
tamquam in amœnum, ac mirificè excultum viridarium in-
gressus ex scintillantium vastâ segete florum aliquos carpam,
& velut in fasciculum ducam. Contra Atheos, ac Theistas
inter alia multa sapienter ostendit, euincitque necessitatem
Primæ Causæ, & illorum insaniam, qui ex fortuita Atomorum
colluue Mundum cõstatum, casuque omnia fluere, somnia-
uerunt: simul qui Naturam esse fatentur, & omnia in Naturam,
eius Auctore dementer excluso, coniiciunt. Iudæos præci-
puè verberat, & confundit Talmudicæ doctrinæ feditate, ab-
surditate, & amentia; Mahometanos pugnantibus inter se
theorematis Alcorani, fabulis etiam, nugis, ineptijs, affe-
ctata ignorantia, obstinato silentio de Lege, impuritate, ob-
stinate morum ac vitæ. Ethnicos pluralitate Deorum per se
impossibili, & in coopertis sceleribus Dijs ipsa scelera vene-
rantes, adorantesque. Atque in hac argumentorum struenda
mole Scientificè, ac Demonstratinè vtpurimum Auctor incum-
bit; itaut ibi arcana patentia naturæ Physicus, ingenij acumi-
na Metaphysicus, nodos ac tricas inextricabiles Logicus,
flores & lumina Rhetor inueniat. Hac de Opere in suas par-
tes diuiso, expensoque, dicere occurrit.

De toto vero, integroque Volumine. Stylus Latinus tota
elocutione, & ornamento grauis, vegetus, & ita floridus est,
ut inter Patres Societatis, in hoc dicendi genere florentissimæ,
nulli hac tempestate secundum esse censeam: simul densus in
sententijs, modestus in Censura, sanus in Iudicijs, & Arte
tam.

tam benè expolitus, & cultus, vt narrando quoque doceat, ac velut tacitè instruat. Tanta præterea rerum plenitudine, & Copia, in breui, pressa, & concisa oratione, restringitur, vt cumulatæ abundantia doctrinæ plures huiusmodi Libros conficiendi explicatori, liberiorique eloquentiæ, ac fusiori stylo, satis argumenti dedisset. Legat illum Missionarius, legat Controuersista, legat Catholicus, & Hæreticus, legat Doctus, & Indoctus. In his literarum nundinis omnia, & opulenter parata pro omnibus sunt.

Hæc habui, Illustrissime, ac Reuerendissime Præsul, quæ pro mea sententia de hoc elegantissimo, & eruditissimo Libro exponerem, vi tamen tuæ iussionis adstrictus; verebar enim, ne mihi in suffragium ituro meritò illud obijceretur, quod de Concione Atheniensium vir quidam præclarus, asseruit, quod scilicet ibi sapientissimus quisque diceret, insulsus verò sententiam ferret. Vale, & optimè vale. In Ædibus S. Siluestri Montis Quirinalis de Vrbe die 26. Iulij 1689.

Dominationis Tuæ Illustrissimæ, ac Reuerendissimæ.

Humillimus, & Studiofissimus Sernus

D. Caietanus Passarellus C.R.

Imprimatur,

Si videbitur Reuerendiss. P. Sac. Apost. Palatij Magistro.

Stephanus Ioseph Menattus Episc. Cyrenen. Vicegerens.

Imprimatur,

Fr. Thomas Maria Ferrari Ord. Præd. Sac. Ap. Palatij Mag.

R O M Æ, M. DC. LXXXIX.

Ex Typographia Nicolai Angeli Tinaßij Impressoris
Reuerendæ Cameræ Apostolicæ.

Superiorum permisso.

1047. 22

98 957430

2





